



Terenga 5: Hōtaka 13 – Te ‘i’ me te ‘ki’ hei pū hono

He Mihi

Ko Ako anō tēnei e whakatau nei i a koutou, kei ngā kairiaki o te tongarerewa tapu o tuawhakarere. Ko te reo te maiaorere i tuituia, i tānikotia e ō tātou tūpuna hei tāwharutanga mō ngā ino, mō ngā whakaturanga o mohoa nei, o haere ake nei hoki; kia mahana tonu ai tātou i roto i te hinamokimoki o te ao hurihuri nei.

Hei Mahi Whakarongo

Ka rangona e tātou te reo rōreka o Majic Paora ā kō ake nei. He whetū maiangi i te ao pūoro.

He kōtiro e ngākaunui ana ki tana reo.

Anei ngā pātai hei whakautu mā koutou:

- 1) Ko hea te wāhi e waiatahia ana e ia?
- 2) Ko wai ngā iwi o reira?
- 3) He aha ngā āhuatanga i pā ki reira, e ai ki te waiata?

He Whakamārama

Ko tētehi o ngā mahi a te **pū** ‘i’ me te pū ‘ki’ i roto i te Reremahi, ko te **hono** i te kupu mahi ki tōna pānga. He ingoa motuhake tō ngā kupu mahi ka pā ki tētehi mea i te whiore o te rerenga, arā, he **tūmahi whiti**. Ka whiti te kupu mahi ki te mea ka pāngia e taua mahi i te whiore o te rerenga, anō he tāwhana. Koinā e kīia nei, he tūmahi whiti ērā momo kupu. Anei ētehi tūmahi whiti: *kite, pā, rongo, pōkai, whakatika, whakapai, whakatutuki, kukume*. Ki te noho ēnei kupu ki te upoko o te rerenga, ā, kāore e whiti atu ki tētehi atu mea, e tārewa ana te rerenga, otirā, kāore anō kia oti pai. Tirohia ngā tauria kei raro nei:

- a) Kei te pōkai ahau... (kāore he whitinga ki te mea e pōkaitia ana, nō reira kāore anō kia oti)
- e) Kua rongo ia... (kāore he whitinga ki te mea e rongohia ana, nō reira kāore anō kia oti)

Ko te mahi a te ‘i’, a te ‘ki’ rānei, he hono i te kupu mahi ki tōna pānga. Ki te ngaro te pū hono, kāore te rerenga e tika.

a) Kei te pōkai ahau i aku kākahu. / Kei te pōkai ahau aku kākahu. ✘
kupu mahi pānga

- e) Kua rongo ia ki ngā matapae huarere. / Kua rongo ia ngā matapae huarere. ✘
- i) E kukume ana a Mere i te taura. / E kukume ana a Mere te taura. ✘

He Mahi Ī-papa

Tuhia kia 3 ngā reremahi poto e kitea ai te pū hono kei runga i te Ī-papa:



Hei Mahi

Whakakīia ngā āputa kei raro iho nei ki te pū hono ‘i’, ‘ki’ rānei:

1. I whai te kurī _____ te punua ngeru.
2. Kei te whana a Dan Carter _____ te whutupōro ki ngā pou paneke.
3. Kua tūtaki au _____ tērā tangata, engari kua wareware te ingoa.
4. Me whakairi koutou _____ ō koutou tāora ki te raina kia maroke ai i te rā.
5. Kua koutou e pā _____ ngā taonga e iri ana i te pātū.

Whakautu:

Mahi Ī-papa: 1. Kua tuhi au i te reta. 2. Kei te kai au i te āporo. 3. E rapu ana au i taku tōkena.

1. i 2. i 3. ki 4. i 5. ki